

# INUIT ATAQATIGIIT

## Inatsisartuni



UPA 2019/pkt. 111

3. april 2019

Aqqa Samuelson

**Angerlarsimaffeqannginnerup akiorneqarnissaa pillugu iliusissatut pilersaarummik kigusinnerpaamik UPA2020-mi Naalakkersuisut saqqummiussinissamik peqquneqarnissaat pillugu Inatsisartunut aalajangiiffigisassatut siunnersuut.**

**(Inatsisartunut ilaasortaq Mimi Karlsen, Inuit Ataqatigiit)**

Inuit Ataqatigiit siunnersuuteqartumut siunnersuummullu pingaaruteqartumut qujapput.

Nunatsinni pinngortitami imaannaangissinnaaqisumi issittorsuarmilu najugaqartuunerput pissutigalugu angerlarsimaffeqanngitsuuneq akuersarneqarsinnaanngitsoq tamattaalluta isumaqatigiissutigisinnaavarput.

Angerlarsimaffeqanngitsut unnuvit tamarluinnaasa unnuiffissarsiortariaqartarput, inuussutigisinnaasaminnillu ujaasiuartaullutik. Amerlanertigut ikinngutini, ilisarimasani majuartarfinni, quini kiilerimilu unnuisariaqartarput, ullormiillu ullormut eqqissilluni siniffissaq isumakuluutigineqartarluni. Inoqatinnguatta angerlarsimaffeqanngitsut apeqquit isumakuluutigiugaat makkuupput: “Unnugu sumi sinissanerpunga? Kina aperissanerpara? Suna inuussutigissavara? Immaqa kiisa qatsuppaannga, ilami aperinissarluunniit qanoruna mersernartatigiva?

Nunatsinni angerlarsimaffeqanngitsut allatulli inuttut pisinnaatitaaffeqarlutik oqqiffeqarsinnaatitaallutik inuussutissaqarsinnaatitaallutillu, namminneq najorsinnaasaminnik kisimiiffigisinnaasaminnik ineqarnissartik kissaatigivaat. Piffissamili matumani angerlarsimaffeqanngitsut initaarnissaat ilimanaateqanngilaq. Taamaattumik angerlarsimaffeqanngitsuunerup akiorneqarnissaa pillugu iliusissatut pilersaarummik Naalakkersuisut saqqummiussaqaqarnissaannut siunnersuuteqarpugut, ataqatigiissaakkamik pilersaarusiortuokkamillu iliuuseqartoqartariaqarmat. Siunnersuuteqartup eqqartuinnarunnaarluta iliuuseqarnissatsinnik oqariartornera taperserparput, tassami angerlarsimaffeqanngitsut pillugit iliusissatut pilersaarusiortuokartariaqarmat.

Angerlarsimaffeqanngitsuunerup akiorniarneqarnerani unammilligassat qulaajarluarnissaat pisariaqarpoq. Iliusissatut pilersaarusiornissamut Nunatsinni angerlarsimaffeqannginnerup pinaveersimatinneqarnissaanut angerlarfimaqqanngitsunut qanittumik akiitsoqarnikkut qanoq siunnersuisoqarsinnaaneranik ingerlatsisoqarsinnaavoq.

# INUIT ATAQATIGIIT

## Inatsisartuni



Angerlarsimaffeqanngitsuunerup akiorniarneqarnerani iliuusissatullu pilersaarut siunissamut pitsanngorsaatisanik timitaliiniarnermi iluaqutaasinnaasutut isigaarput.

Inuttut ineqarneq pisinnaatitaaffiuvoq. Ineqanngikkaanni ataqqinartumik toqqissimasumillu inuunissaq imminut pilersorsinnaanani ajornerulertarpoq. Nuna tamakkerlugu angerlarsimaffeqannginnerup akiorneqarnissaanut iliuusissatut pilersaarummik suliaqartoqarnissaa piumasaraarput, angerlarsimaffeqanngitsut neriuuteqalersinneqarnissaat kialaartumik ataqqinartumillu inuuneqalernissaat pingaartikkatsigu.

Angerlarsimaffeqanngitsut isumassortariaqavissut sullinneqarnerat isumassorneqarnerallu ersarinnerulertariaqarpoq, tamannalu iliuusissatut pilersaarusiornikkut anguneqarsinnaasoq isumaqarpugut.

Angerlarsimaffeqanngitsut ikorfartorniarlugit najugaqarfigigallarneqarsinnaasunik peqarnissarput ataqatigiissarluakkamik sumiiffinni tamani pilersaarusiorneqartariaqarpoq. Angerlarsimaffeqanngitsut alloriaqqinnissaat anguniarlugu inuttut nukittunerulersinniarlugit najugaqarfiugallartuni ivaneqassapput, siunnersorneqarlutik angerlarsimaffittaarsinnaanissaallu qulakkeerniarlugu aqutissiuunneqartariaqarlutik. Angerlarsimaffeqanngitsut inuttut piginnaanngorsartariaqarput isumassorneqarlutillu inuunermi neriuuteqalersinnissaat initaarsinnaanissaallu qulakkeernissaa angutserlugu.

Nunatsinni angerlarsimaffeqanngitsuuneq akiorneqassappat naalakkersuinikkut suleqatigiittariaqarpugut, immitsinnut assammilluta pimoorullugulu oqartariaqarpugut “angerlarsimaffeqanngitsuuneq tassunga killittariaqalerpoq”. Angerlarsimaffeqanngitsuuneq annertusisamik iliuuseqarfigineqassappat, iliuusissatut pilersaarusiornermi inuit tamaasa pisariaqartikkatsigit, angerlarsimaffeqalernermi inuiaqatigiinni suliffeqarluni inuunissamut periarfissaqarnerussammat, taamaaliornikkut Nuna tamakkerlugu angerlarsimaffeqanngitsuunerup akiorniarneqarnerani nukiit amerlanerpaat atorneqarnissaat qularnaarneqarsinnaammat.

Nunatsinni angerlarsimaffeqanngitsuunerup akiorneqarnissaanut iliuusissatut pilersaarusiortoqarnissaa tamakkiisumik taperserlugu, siunnersuut taamatut isikkoqartillugu akuersissutigineqarnissaa innersuupparput.